

ИНФЛЯЦИЙН ХҮЛЭЭЛТ

ТҮҮВЭР СУДАЛГААНЫ ТАЙЛАН



2018 ОНЫ IV УЛИРЛЫН ТАЙЛАН

Энэхүү тайланд зөвхөн түүвэр судалгаанд хамрагдсан иргэд, аж ахуй нэгж болон шинжээчдийн эдийн засгийн төлөв байдлын талаарх хүлээлтийн үр дүнг нэгтгэн тайлагнасан учир Монголбанкны албан ёсны байр суурь биш болно.

ИРГЭДИЙН ИНФЛЯЦИЙН ХҮЛЭЭЛТ

1-Р БҮЛЭГ



ТҮҮВЭР СУДАЛГАА
2018 ОНЫ IV УЛИРАЛ

1. Иргэдийн Инфляцийн Хүлээлт


Инфляцийн талаарх иргэдийн хүлээлтийн түүвэр судалгааг Дэлхийн банкны “САРГ” системд суурилан 2018 оны 11 дүгээр сарын 12-ноос 19-ний өдрүүдэд Улаанбаатар хотын 7 дүүргийн нийт 864 иргэнийг санамсаргүй түүврийн аргаар сонгон судалгааг гүйцэтгэлээ. Түүвэр судалгаанаас дараах гол үр дүнгүүд гарлаа:

- Иргэд инфляцийн түвшинг i) чанарын хариултын хувьд 2019 оны I улиралд 8.4%, **2019 оны IV улиралд 10.8%** байхаар; ii) тоон хариултын хувьд 2019 оны I улиралд 6.0%, **2019 оны IV улиралд 6.2%** байхаар; iii) мэдрэмж (үнийн өсөлтийг мэдэрч буй байдал)-д суурилсан инфляцийн хүлээлтийн хувьд 2019 оны I улиралд 7.2%, **2019 оны IV улиралд 7.5%** байхаар тус тус хүлээж байна;
- Судалгаанд хамрагдсан иргэдийн 75% нь 2019 оны эцэст инфляцийн түвшинг зорилтот түвшин болох 8%-аас хэтрэхгүй гэж хүлээж байна;
- Иргэдийн төгрөгт итгэх итгэл өндөр хэвээр байж, хадгаламж, зээлийн хүү ирэх нэг жилийн хугацаанд хэвэндээ байна гэсэн хүлээлттэй байна;
- Иргэдийн дунд эдийн засгийн төлөв байдал муудна гэсэн сөрөг хүлээлт давамгайлж байна.

1.1. Инфляцийн хүлээлт

Чиглэлийн индексээс харахад иргэдийн инфляцийн талаарх хүлээлт хандлагаараа 2017 оны сүүлээс буурч байсан боловч 2018 оны 3-р улирлаас эхлэн өсөх төлөв ажиглагдаж, 2018 оны 4-р улирлын судалгааны дүнгээр иргэдийн дунд инфляци өснө гэсэн хандлага мэдэгдэхүйц нэмэгдлээ /Зураг 1-1/.

Зураг 1- 1. Үнийн өсөлтийн талаарх хандлага /чиглэлийн индекс, ирэх 12 сар/



Зураг 1- 2. Иргэдийн инфляцийн хүлээлт /чанарын болон тоон хариултаар/



Эх сурвалж: Монголбанк, иргэдийн хүлээлтийн түүвэр судалгаа


Иргэдийн инфляцийн хүлээлтийг тоон болон чанарын аргачлалаар тооцлоо. Чанарын хариултыг Карлсон-Паркины аргачлалд тулгуурлан тоон үзүүлэлт рүү шилжүүлж тооцоход иргэд инфляцийг 2019 оны I улиралд 8.4%, **2019 оны IV улиралд 10.8%** байхаар хүлээж байна. Харин иргэдийн инфляцийн хүлээлтийг тоон хариултад тулгуурлан тооцоход 2019 оны I улиралд 6.0%, **2019 оны IV улиралд 6.2%**-тай байна. Түүнчлэн өнгөрсөн үеийн мэдрэмжид суурилсан инфляцийн түвшин /perceived inflation/² 2019 оны I улиралд 7.2%, **2019 оны IV улиралд 7.5%**-тай байхаар тус тус хүлээгдэж байна /Зураг 1-2/.

Хүлээлтийн чанарын хариултаас харвал иргэдийн 86% нь ирэх 12 сард үнийн түвшин ерөнхийдөө өснө гэж үзсэн бөгөөд үүнээс 33% нь үнийн түвшин илүү хурдацтайгаар өснө (өмнөх судалгааны дүнгүүдээс өссөн), 40% нь үнэ өснө гэхдээ өсөлтийн хурдац өөрчлөгдөхгүй гэж хариулжээ /Зураг 1-3/.


Иргэдийн инфляцийн хүлээлтийг тоон утгаар асууж, хариултуудын жигнэсэн дундаж утгыг тооцон үзэхэд инфляцийг ирэх улиралд буюу 2019 оны I улиралд 6.0%, жилийн дараа буюу 2019 оны IV улиралд 6.2%-тай байхаар хүлээж байна. Өөрөөр хэлбэл тоон хариултын хувьд **иргэдийн дунд ирэх 12 сарын хугацаанд инфляци өнөөдрийн түвшнээс өснө гэсэн хүлээлт давамгайлж байна** /Зураг 1-4/.

Харин жилийн дараа инфляци 6-8% байна гэсэн хариултыг иргэд хамгийн их давтамжтай өглөө.

Зураг 1- 3. Ирэх 12 сарын хугацаанд үнийн түвшин хэрхэн өөрчлөгдөх вэ?



Зураг 1- 4. Иргэдийн инфляцийн хүлээлтийн тархалт /тоон хариултаар/




Эх сурвалж : Монголбанк, иргэдийн хүлээлтийн түүвэр судалгаа

²-Монголбанкны Судалгааны Товхимол-7. “Инфляцийн хүлээлтийг тооцох арга, аргачлалыг өргөжүүлэх нь” сэдэвт судалгааны ажлаас дэлгэрэнгүйг харна уу.


Хүлээлтийн тоон хариултаас харахад иргэд жилийн дараах хүнсний бус бүтээгдэхүүний инфляцийг 6.2%, хүнсний бүтээгдэхүүний инфляцийг 6.4%-тай байхаар хүлээж байна /Зураг 1-5/. Инфляцийн хүлээлтийн талаарх хариултын тархалтаас харахад 2019 оны эцэст хүнсний бүтээгдэхүүний үнийн өсөлт 6-8% байх хариулт хамгийн өндөр давтамжтай байна.

Судалгаанд хамрагдсан иргэдийн 75% нь 2019 оны эцэст инфляцийн түвшинг зорилтот түвшин болох 8%-аас хэтрэхгүй гэж хүлээж байна /Зураг 1-6/.

Зураг 1- 5. Инфляцийн хүлээлтийн тархалт /хүнсний, хүнсний бус, ирэх 12 сар/



Зураг 1- 6. Инфляцийн хүлээлтийн хуримтлагдсан тархалт /тоон хариултаар/



Эх сурвалж : Монголбанк,иргэдийн хүлээлтийн түүвэр судалгаа

1.2. Эдийн засгийн өсөлт, иргэдийн орлого


2017 оны I улирлаас хойш иргэд ирэх нэг жилийн хугацаанд эдийн засгийн ерөнхий байдал сайжирна гэсэн эерэг хүлээлттэй байсан хэдий ч энэ удаагийн түүвэр судалгааны дүнгээр эдийн засгийн чиглэлийн индекс өмнөх улирлын судалгааны дүнгээс эрс буурч “эдийн засгийн байдал муудна” гэсэн мужид шилжлээ. Өөрөөр хэлбэл, судалгаанд хамрагдсан **иргэдийн дийлэнх нь ирэх 12 сарын хугацаанд эдийн засгийн байдал муудна гэсэн хүлээлттэй байна** /Зураг 1-7/.

Энэ удаагийн иргэдийн өрхийн санхүүгийн байдлын чиглэлийн индексээс харахад иргэдийн дийлэнх нь **ирэх 12 сарын хугацаанд өрхийн санхүүгийн байдал сайжирна** гэсэн эерэг хүлээлттэй байгаа боловч өмнөх улиралтай харьцуулахад огцом буурлаа /Зураг 1-8/.


1.3. Валютын ханшийн хүлээлт

Валютын ханшийн хүлээлтийн чиглэлийн индексээс харахад 2017 оны I улирлаас эхлэн иргэдийн хувьд төгрөгийн ханш чангарна гэсэн хүлээлт нэмэгдсэн, улмаар 2018 оны IV улиралд явуулсан судалгаагаар иргэдийн дунд төгрөгийн ханш чангарна гэсэн хүлээлт өндөр хэвээр байна /Зураг 1-9/.

Зураг 1- 7. Ирэх 12 сарын эдийн засгийн төлөвийн талаарх хүлээлт /ирэх 12 сард/




Зураг 1- 8. Өрхийн санхүүгийн талаарх хүлээлт /ирэх 12 сард/



Тайлбар: Чиглэлийн индекс [-1;1] завсарт утгаа авна. [0;1] эдийн засгийн байдал сайжирна, [0] хэвэндээ байна, [0;-1] муудна.

Зураг 1- 9. Ирэх 12 сарын хугацаанд валютын ханшийн талаарх хүлээлт




Эх сурвалж: Монголбанк, иргэдийн инфляцийн хүлээлтийн түүвэр судалгаа

1.4. Хадгаламж, зээлийн хүүний хандлага


2017 оны I улирлаас эхлэн иргэдийн дунд зээлийн хүү буурна гэсэн хүлээлт нэмэгдсэн. 2018 оны IV улиралд явуулсан судалгаагаар иргэдийн дийлэнх нь ирэх 12 сарын хугацаанд зээлийн хүү хэвэндээ байна гэсэн хүлээлттэй байна /Зураг 1-10/.

Судалгаанд хамрагдсан иргэдийн дунд ирэх 12 сарын хугацаанд хадгаламжийн хүү өөрчлөгдөхгүй гэсэн хүлээлт давамгайлж байна /Зураг 1-11/.

Зураг 1-10. Зээлийн хүүний талаарх хүлээлт /ирэх 12 сард/



Зураг 1-11. Хадгаламжийн хүүний талаарх хүлээлт /ирэх 12 сард/



Эх сурвалж : Монголбанк,иргэдийн хүлээлтийн түүвэр судалгаа

АЖ АХУЙ НЭГЖИЙН ИНФЛЯЦИЙН ХҮЛЭЭЛТ

2-Р БҮЛЭГ



ТҮҮВЭР СУДАЛГАА
2018 ОНЫ IV УЛИРАЛ

2. Аж Ахуй Нэгжийн Инфляцийн Хүлээлт

ААН-ийн хүлээлтийн түүвэр судалгааг Дэлхийн банкны “САР” системд суурилан 2018 оны 11 дүгээр сарын 20-ны өдрөөс 25-ны өдрүүдэд Улаанбаатар хотод үйл ажиллагаа эрхэлж буй нийт 373 бизнес эрхлэгчдийг санамсаргүй түүврийн аргачлалаар сонгон авч гүйцэтгэлээ. Түүвэр судалгаанаас дараах үр дүнгүүд гарлаа:

- ААН-үүд инфляцийн түвшинг i) чанарын хариултын хувьд 2019 оны I улиралд 3.8%, **2019 оны эцэст 4.2%**; ii) тоон хариултын хувьд 2019 оны I улиралд 5.9%, **2019 оны эцэст 6.3%**; iii) мэдрэмж (үнийн өсөлтийг мэдэрч буй байдал)-д суурилсан инфляцийн хүлээлтийн хувьд 2019 оны I улиралд 4.3%, **2019 оны эцэст 4.9%** байхаар тус тус хүлээж байна;
- ААН-үүдийн дунд төгрөгийн ханш суларна гэсэн хүлээлт давамгайлж байна;
- ААН-үүд ирэх 3 сарын хугацаанд нийт эрэлт багасч, борлуулалтын орлого буурна гэж хүлээж байгаа бөгөөд цалингийн түвшинг бага зэрэг өснө гэж таамаглаж байна;

2.1. Инфляцийн хүлээлт

Чиглэлийн индексээс харахад ААН-үүдийн инфляцийн талаарх хүлээлт 2014 оноос эхлэн буурч 2017 оноос 2018 оны эхний хагас хүртэл бизнес эрхлэгчдийн дунд инфляци буурна гэх хүлээлт давамгайлж байсан хэдий ч 2018 оны III улирлаас эхлэн инфляцийн хүлээлт хандлагаараа өсөж эхэллээ. Өөрөөр хэлбэл, 2018 оны IV улирлын судалгааны дүнгээр ААН-үүдийн дийлэнх нь инфляцийг одоогийн түвшинд хадгалагдана гэж үзэж байна /Зураг 2.1/.

Зураг 2-1. ААН-ийн үнийн өсөлтийн хүлээлт /чиглэлийн индекс, 12 сарын дараа/



Зураг 2-2. ААН-ийн инфляцийн хүлээлт /чанар болон тоон хариултаар/



Эх сурвалж: Монголбанк, ААН-ийн хүлээлтийн түүвэр судалгаа

¹-Өснө, буурна гэсэн хариултуудын зөрүүгээр чиглэлийн индексийг (тэнцлийн статистик) тооцно. Ингэхдээ ААН-үүдээс ирэх 12 сард үнийн өсөлт ямар байх талаар асууж, хариултуудыг [3;-1] байхаар нормчилж чиглэлийн индексийг тооцсон.

ААН-үүдийн хүлээлтийг тоон болон чанарын аргачлалаар тооцлоо. Чанарын хариултыг Карлсон-Паркины аргачлалд тулгуурлан тоон үзүүлэлт рүү шилжүүлж тооцоход бизнес эрхлэгчид инфляцийг 2019 оны I улиралд 3.8%, 2019 оны IV улиралд 4.2%-тай байхаар хүлээж байна.

Бизнес эрхлэгчдийн инфляцийн хүлээлтийг тоон утгаар асууж, хариултуудын жигнэсэн дундаж утгыг тооцон үзэхэд инфляцийг ирэх улиралд 5.9%, жилийн дараа буюу 2019 оны IV улиралд 6.3%-тай байхаар хүлээж байна. Ирэх оны инфляцийг 6-8 хувьд байна гэсэн хариултыг судалгаанд хамрагдсан ААН-үүдийн дийлэнх нь өглөө /Зураг 2.3/.

Түүнчлэн өнгөрсөн үеийн мэдрэмжид суурилсан инфляцийн түвшин /perceived inflation² 2019 оны эхээр 4.3%, 2019 оны сүүлээр 4.9%-тай байхаар тус тус хүлээж байна /Зураг 2.2/.


Судалгаанд хамрагдсан ААН-үүдийн 78% нь 2019 оны эхэнд инфляцийн түвшинг зорилтот түвшин болох 8%-аас бага байна гэж үзсэн бол 2019 оны IV улиралд ААН-ийн 73% нь инфляци зорилтот түвшнээс доогуур түвшинд байна гэж хүлээж байна /Зураг 2.4/.

2.2. Валютын ханш, зээлийн хүүний хүлээлт


2018 оноос эхлэн ханшийн чиглэлийн индекс өсөх хандлагатай байгаа бөгөөд энэ удаагийн түүвэр судалгааны дүнгээр тус индекс нь төгрөгийн ханш суларна гэсэн мужид 2015 оны II улирлаас хойш анх удаа гарсан байна /Зураг 2.5/.

²-Монголбанкны Судалгааны Товхимол-7. “Инфляцийн хүлээлтийг тооцох арга, аргачлалыг өргөжүүлэх нь” сэдэвт судалгааны ажлаас дэлгэрэнгүйг харна уу.

Зураг 2-3. ААН-ийн инфляцийн хүлээлт /тархалт, тоон хариултаар/



Зураг 2-4. ААН-ийн инфляцийн хүлээлт /хуримтлагдсан тархалт, тоон хариултаар/



Зураг 2-5. Ирэх 12 сарын хугацаан дахь валютын ханшийн хүлээлт



Эх сурвалж: Монголбанк, ААН-ийн хүлээлтийн түүвэр судалгаа

2019 оны I улиралд зээлийн хүүний чиглэлийн индекс өмнөх улирлаас бага зэрэг буурсан дүнтэй гарсан боловч өсөх мужид хадгалагдаж байна. Энэ нь ААН-үүдийн дунд зээлийн хүү ирэх 12 сарын хугацаанд өснө гэсэн хүлээлттэй байгааг илтгэнэ /Зураг 2.6/.

2.3. Аж ахуй нэгжийн үйл ажиллагаа

ААН-үүд өнгөрсөн 3 сарын хугацаанд бүтээгдэхүүн, үйлчилгээний эрэлт харьцангуй тогтвортой байсан гэж үзжээ. Харин ирэх 3 сарын хугацаанд борлуулж буй барааны эрэлт нь буурна гэсэн хүлээлттэй байна /Зураг 2.7/.

ААН-үүдийн хувьд үйл ажиллагаагаа тэлэх орон зай багасч, улмаар ирэх 3 сарын хугацаанд ажлын байрыг нэмэгдүүлэх төлөвлөгөөгүй байна. Харин цалинг ирэх 3 сарын хугацаанд бага зэрэг нэмэгдэнэ гэж хүлээж байна /Зураг 2.8/.


Судалгаанд оролцогч бизнес эрхлэгчдийн 17% нь ирэх 3 сарын хугацаанд үйл ажиллагаагаа өргөжүүлэхээр төлөвлөж байгаа нь өмнөх улирлын судалгааны үр дүнгээс 9%-иар багассан байна. Үйл ажиллагаагаа өргөжүүлэх ААН-үүдийн дийлэнх нь санхүүжилтээ банкны зээлээр (31%) болон өөрийн хөрөнгөөр (28%) бүрдүүлнэ гэж хариулжээ /Хавсралт 2-3/.

Тайлбар: Индекс $[-1;1]$ завсарт утгаа авна. $[0;1]$ өснө, $[0]$ өөрчлөгдөхгүй, $[0;-1]$ буурна.

Зураг 2-6. Ирэх 12 сарын хугацаанд зээлийн хүүний хүлээлт



Зураг 2-7. Бүтээгдэхүүн, үйлчилгээний эрэлт /өнгөрсөн 6 сар болон ирэх 6 сард/



Зураг 2-8. Ирэх 6 сарын хугацаанд ажлын байр болон цалингаа нэмэгдүүлэх эсэх



Эх сурвалж: Монголбанк, ААН-ийн хүлээлтийн түүвэр судалгаа

ДҮГНЭЛТ, ХАВСРАЛТ

3-Р БҮЛЭГ



ТҮҮВЭР СУДАЛГАА
2018 ОНЫ IV УЛИРАЛ

3. ДҮГНЭЛТ

3.1. Иргэдийн инфляцын хүлээлтийн түүвэр судалгааны дүгнэлт

Судалгааны үр дүнгээс харахад иргэд 2019 оны IV улиралд инфляцийг 6.2% /тоон хариултын хувьд/, 7.5% /мэдрэмжид суурилсан/, 10.8% /чанарын хариултын хувьд/ тус тус байхаар хүлээж байна.

Судалгаанд хамрагдсан иргэдийн 75% нь 2019 оны эцэст инфляцийн түвшинг зорилтот түвшин болох 8%-аас хэтрэхгүй гэж хүлээж байна.

2017 оны I улирлаас хойш иргэд ирэх нэг жилийн хугацаанд эдийн засгийн ерөнхий байдал сайжирна гэсэн эерэг хүлээлттэй байсан хэдий ч энэ удаагийн түүвэр судалгааны дүнгээр иргэдийн дийлэнх нь ирэх 12 сарын хугацаанд эдийн засгийн байдал муудна гэсэн хүлээлттэй гарлаа. Ирэх нэг жилийн хугацаанд хадгаламж болон зээлийн хүү хэвэндээ байна гэсэн хүлээлт давамгайлж байна.

3.2. Аж ахуй нэгжийн инфляцийн хүлээлтийн түүвэр судалгааны дүгнэлт

ААН-үүдийн инфляцийн хүлээлтийн санал асуулгын дүнгээр ААН-үүд 2019 оны эцэст инфляцийг 4.2% /чанарын хариулт/, 4.9% /мэдрэмжид суурилсан/, 6.3% /тоон хариулт/ тус тус байхаар хүлээж байна.

ААН-үүдийн 73% нь 2019 оны эцэст инфляцийн түвшинг зорилтот түвшин болох 8%-аас доогуур байна гэж хүлээж байна.


Мөн судалгаанд хамрагдсан ААН-үүдийн дийлэнх нь ирэх 12 сарын хугацаанд төгрөгийн ам.доллартай харьцах ханшийг суларна гэж таамаглаж байна.

Ирэх 3 сарын хугацаанд нийт эрэлт багасч, борлуулалтын орлого буурснаар үйл ажиллагаагаа тэлэх орон зай багасна гэж судалгаанд хамрагдсан ААН-үүд харж байна. Мөн эдгээр ААН-үүд ажлын байрыг нэмэгдүүлэх төлөвлөгөөгүй байгаа бөгөөд цалингийн түвшинг бага зэрэг өсгөх хандлагатай байна.


ХАВСРАЛТ 1.

Судалгаанд оролцсон нийт иргэдийн 58% нь эмэгтэй, 42% эрэгтэй бөгөөд насны байдлаар нь авч үзвэл 46% нь 18-25, 26% нь 26-35, 15% нь 36-45, 9% нь 46-55, 4% нь 56-аас дээш гэсэн насны ангилалд хамрагдаж байна. /Хавсралт 1-1, Хавсралт 1-2/

Хавсралт 1-1. Хүйс



Хавсралт 1-2. Нас




Мөн судалгаанд оролцогчидийн 46% нь бүрэн дунд, 50% нь дээд боловсролтой бөгөөд тэн хагас нь сард 700.000 төгрөгөөс их зардал гаргадаг байна.

Хавсралт 1-3. Боловсролын түвшин




Хавсралт 1-4. Сарын дундаж зардал



Эх сурвалж : Монголбанк,иргэдийн хүлээлтийн түүвэр судалгаа

Инфляцийн талаарх иргэдийн хүлээлтийн түүвэр судалгааг Дэлхийн банкны “САРГ” системд суурилан 2018 оны 11 дүгээр сарын 12-ноос 19-ний өдрүүдэд Монгол Улсын Их Сургууль болон Санхүү Эдийн Засгийн Их Сургуулийн оюутнуудтай хамтран Улаанбаатар хотын 7 дүүргийн 864 иргэнийг санамсаргүй түүврийн аргаар сонгон судалгааг гүйцэтгэлээ. Түүвэр судалгаа авсан газарзүйн тархалтыг *Хавсралт 1-5*-т үзүүлэв.

Хавсралт 1-5. Түүвэр судалгаа авсан газарзүйн тархалт





ХАВСРАЛТ 2.

Судалгаанд хамрагдсан нийт 373 аж ахуй нэгж, байгууллагуудыг өмчлөлийн хэлбэрээр авч үзвэл 169 (45%) нь хязгаарлагдмал хариуцлагатай компани, 135 (36%) нь бусад хэлбэрийн, 40 (11%) нь хувьцаат компани, 18 (5%) нь нөхөрлөл болон үлдсэн 10 (3%) нь өөр бусад төрлийн өмчлөлийн хэлбэртэй байгууллагууд байлаа (Хавсралт 2-1).

Хавсралт 2-1. Аж ахуй нэгжийн тоо /өмчлөлөөр/

Аж ахуйн нэгжийн хэлбэр	тоо	хувь
Хязгаарлагдмал хариуцлагатай компани	169	45%
Нөхөрлөл	18	5%
Хоршоо	10	3%
Хувьцаат компани	40	11%
Төрийн өмчит үйлдвэрийн газар	1	0%
Бусад	135	36%
НИЙТ ДҮН	373	100,0%

Аж ахуйн нэгжүүдийг эдийн засгийн салбаруудаар ангилан авч үзвэл нийт 373 ААН-ээс үйлчилгээ эрхэлдэг 47%, бөөний болон жижиглэнгийн худалдаа эрхэлдэг 26%, боловсруулах үйлдвэрлэлийн үйл ажиллагаа эрхэлдэг 3% болон бусад төрлийн үйл ажиллагаа эрхэлдэг 14% байна (Хавсралт 2-2).

Хавсралт 2-2. Аж ахуй нэгжийн тоо /салбараар, ажилтны тоогоор/

Салбарын ангилал	Ажилчдын тоо /бүлгээр/					Бүгд
	< 10	11–19	20–49	50–100	101 <	
Хөдөө аж ахуй	0%	0%	0%	1%	0%	2%
Уул уурхай, олборлох	0%	0%	1%	1%	0%	2%
Боловсруулах үйлдвэр	1%	0%	1%	1%	0%	3%
Барилга	2%	0%	1%	2%	0%	5%
Б/Ж худалдаа	25%	0%	0%	0%	0%	26%
Үйлчилгээ	38%	5%	2%	2%	1%	47%
Тээвэр	0%	0%	0%	0%	0%	0%
Бусад	13%	0%	0%	1%	0%	14%
НИЙТ ДҮН	79,0%	5,2%	5,2%	7,7%	2,9%	100%

Эх сурвалж: Монголбанк, ААН-ийн хүлээлтийн түүвэр судалгаа

Судалгаанд хамрагдсан нийт 373 аж ахуй нэгж, байгууллагуудын дийлэнх буюу 79.0% нь 9 хүртэл ажилчинтай, 5.2% нь 10-19 ажилчинтай, 5.2% нь 20-49 ажилчинтай, үлдсэн 10.6% нь 50-с дээш ажилчинтай аж ахуй нэгжүүд хамрагджээ (*Хавсралт 2-2*).

Судалгаанд оролцогч ААН-үүдийн дийлэнх буюу 83% нь ирэх 6 сарын хугацаанд компанийнхаа үйл ажиллагааг өргөжүүлэх төлөвлөгөөгүй байна гэж хариулжээ. Харин бизнес эрхлэгчдийн 17% нь ирэх 6 сарын хугацаанд үйл ажиллагаагаа өргөжүүлэхээр төлөвлөж байгаа бөгөөд үүний тулд ихэнх ААН банкны зээлээр (31%) болон өөрийн хөрөнгөөр (28%) санхүүжүүлнэ гэж хариулсан байна /*Хавсралт 2-3*/.

Хавсралт 2-3. Ирэх 6 сарын хугацаанд үйл ажиллагааг өргөжүүлэх эсэх

Санхүүжилтийн хэлбэр	Үйл ажиллагаагаа өргөжүүлэх үү?	
	Тийм	Үгүй
Банкны зээлээр	31%	
Компанийн өөрийн хөрөнгөөр	28%	
Хувьцаа гаргах	5%	
Гадаад эх үүсвэрээр	8%	
Бусад санхүүгийн байгууллагын эх үүсвэрээр	6%	
Тэтгэлэг, тусламжаар	3%	
Хувь хүнээс зээлэх	8%	
Бусад	12%	
НИЙТ ДҮН	17%	83%

Эх сурвалж: Монголбанк, ААН-ийн хүлээлтийн түүвэр судалгаа

Хавсралт 2-4. Түүвэр судалгаа авсан газарзүйн тархалт

